

ZAPISNIK

Sa pete sjednice Komisije za tumačenje i praćenje Kolektivnog ugovora između Vlade Unsko-sanskog kantona, Sindikata policije Unsko-sanskog kantona i Sindikata policijskih službenika Ministarstva unutrašnjih poslova Unsko-sanskog kantona (u daljem tekstu: Komisija), održane dana 23.02.2026. godine u Ministarstvu unutrašnjih poslova.

Započeto u 11:00 h

Prisutni članovi:

1. Arijana Šabić – predstavnik ispred Vlade Unsko-sanskog kantona
2. Sadeta Dizdarić – predstavnik ispred Vlade Unsko-sanskog kantona
3. Mirsad Mahmutović – predstavnik ispred Sindikata policije Unsko-sanskog kantona

Nakon uvodne javne rasprave, usvojen je sljedeći:

DNEVNI RED

1. Rješavanje po zahtjevu za tumačenje Kolektivnog ugovora dostavljenog od strane Sindikata policije Unsko-sanskog kantona aktom broj: S-024/2026 od dana 11.02.2026. godine,
2. Rješavanje po zahtjevu za analizu Kolektivnog ugovora dostavljenog od strane Sindikata policije Unsko-sanskog kantona aktom broj: S-026/2026 od dana 16.02.2026. godine,
3. Razno.

1. Komisija je pristupila razmatranju zahtjeva za tumačenje odredbe člana 31. Kolektivnog ugovora dostavljenog od strane Sindikata policije Unsko-sanskog kantona aktom broj: S-024/2026 od dana 11.02.2026. godine, kojim se ističu navodi da se Sindikatu policije USK obratio veći broj članova Sindikata iz kategorije policijskih službenika koji su raspoređeni na radnim mjestima u kriminalističkoj policiji, a koji su prilikom podjele službene obuke uskraćeni za pravo na zaduženje iste uz obrazloženje da je u toku godine izvršena isplata novčane naknade u pomenute svrhe. U aktu Sindikata se dalje ističe da je članom 31. Kolektivnog ugovora utvrđeno pravo na naknadu policijskog službenika u kriminalističkoj policiji u svrhu kupovine civilne odjeće. Prema navodima iz zaprimljenog akta Sindikata jasno je precizirano da se radi o naknadi na koju navedeni policijski službenici ostvaruju pravo u svrhu kupovine civilne odjeće.

Nakon provedene rasprave jednoglasno je donesen sljedeći:

ZAKLJUČAK

- Odredbom člana 31. Kolektivnog ugovora propisano je:

„(Pravo na naknadu za policijskog službenika u u kriminalističkoj policiji)

(1) Policijski službenik koji je raspoređen u Sektor kriminalističke policije i njegove organizacione jedinice, odnosno u Odjeljenja kriminalističke policije u policijskim stanicama, ima pravo na jednokratnu naknadu u iznosu od 30% od prosječne neto plaće isplaćene u Federaciji za prethodnu godinu u svrhu kupovine civilne odjeće.

(2) Naknada iz stava (1) ovog člana utvrđuje se rješenjem direktora Uprave policije i isplaćuje se istom policijskom službeniku svake godine u posjednjem kvartalu tekuće Budžetske godine.“

Dakle, ostvarivanje prava na jednokratnu naknadu pripada policijskom službeniku koji je raspoređen u Sektor kriminalističke policije i njegove organizacione jedinice, odnosno u Odjeljenja kriminalističke policije u policijskim stanicama i to u visini od 30% od prosječne neto plaće isplaćene u Federaciji za prethodnu godinu. Navedena odredba propisuje pravo za policijskog službenika na naknadu isključivo u svrhu kupovine civilne odjeće, dok obuća nije predmetom prava na naknadu.

S druge strane, odredbom člana 5. Zakona o policijskim službenicima USK- prečišćeni tekst („Službeni glasnik USK“ broj: 27/24), propisano je da se određeni policijski zadaci mogu vršiti u civilu ili u posebnoj odjeći i sa odgovarajućom opremom. Nadalje, Uredbom o jedinstvenoj policijskoj uniformi policijskih snaga u Federaciji BiH („Službene novine FBiH“, br.60/2023) u članu 22. stav (1) određeno je da policijski službenik zadužuje policijsku uniformu koja je propisana za radno mjesto na koje se raspoređuje, osim ako poslove radnog mjesta obavlja isključivo u građanskom odijelu. Ista odredba u stavu (3) propisuje da policijski službenik koji poslove radnog mjesta obavlja isključivo u građanskom odijelu zadužuje dijelove osnovne policijske uniforme (radne) i uniformu interventne policije u slučaju odlaska na seminare, obuke ili u mirovne misije, za koje je propisano obavezno nošenje policijske uniforme.

Prema tome, stav je Komisije da policijski službenici koji obavljaju poslove kriminalističke policije, ne zadužuju službenu uniformu, a čiji sastavni dio su i zimske čizme, osim u slučajevima odlaska na seminare, obuke ili u mirovne misije, za koje je propisano obavezno nošenje policijske uniforme. Nadalje, stav je Komisije da policijski službenici kriminalističke policije imaju pravo i dužnost da zaduže dijelove osnovne policije uniforme (radnu uniformu) u skladu sa odredbama člana 22. Uredbe o jedinstvenoj policijskoj uniformi policijskih snaga u Federaciji BiH, a obaveza je poslodavca izvrši nabavku i zaduženje naprijed navedene radne uniforme.

2. Komisija je potom pristupila razmatranju zahtjeva za analizu Kolektivnog ugovora dostavljenog od strane Sindikata policije Unsko-sanskog kantona aktom broj: S-026/2026 od dana 16.02.2026. godine u kojem se ističe da je članom 41. Kolektivnog ugovora utvrđeno pravo policijskog službenika na naknadu za prijevoz na posao i sa posla. Stavom (1) iste odredbe propisano je da policijskom službeniku koji nije u mogućnosti iz opravdanih razloga da koristi osiguran prijevoz na posao i sa posla, a čije je mjesto stanovanja od mjesta rada udaljeno najmanje pet kilometara pripada naknada za troškove prijevoza u visini mjesečne karte gradskog, prigradskog i međugradskog saobraćaja, srazmjerno broju radnih dana provedenih na poslu, s tim da iznos navedene naknade ne može biti veći od 25% prosječne neto plaće isplaćene u Federaciji prema posljednjem objavljenom statističkom podatku. Nadalje se ističe da je Vlada Unsko-sanskog kantona dana 21.02.2025. godine, donijela Odluku o visini i načinu ostvarivanja prava na naknadu za prijevoz na posao i prijevoz s posla za korisnike Budžeta Unsko-sanskog kantona („Službeni glasnik Unsko-sanskog kantona“, broj: 7/25), koja nije usaglašena sa Kolektivnim ugovorom i na koju je navedeni Sindikat dao negativno mišljenje. Od Komisije za tumačenje Kolektivnog ugovora zahtijeva se da izvrši analizu primjene Kolektivnog ugovora i donese zaključak kojim se utvrđuje da li se isti poštuje od strane poslodavca kada je u pitanju ova vrsta naknade.


Nakon provedene rasprave jednoglasno je donesen sljedeći:

ZAKLJUČAK

Komisija konstatuje da je odredbom člana 41. Kolektivnog ugovora kojom se uređuje pravo policijskog službenika na naknadu prijevoza s posla i na posao različito uređeno u odnosu sadržaj Odluke o visini i načinu ostvarivanja prava na naknadu za prijevoz na posao i prijevoz s posla za korisnike Budžeta Unsko-sanskog kantona, te se radi daljeg nadležnog postupanja i usaglašavanja zahtjev Sindikata policije Unsko-sanskog kantona broj: S-026/2026 od dana 16.02.2026. godine na nadležnost dostavlja Pregovaračkom timu za pregovore sa granskim sindikatima za oblast unutrašnjih poslova.

Sa petom sjednicom Komisije završeno u 12:35.

Konstatuje se da prisutni članovi nemaju primjedbi na sačinjeni zapisnik.



Broj: 0501/01-02-5/26
Dana: 25.02.2026